

Ketvėrtuoji Varniu konperencėjė

Lėipas 28-31 dėnuom Varniūs vyka ketvėrtuoji Varniu konperencėjė. Anou organizava preitu metu vasara ikorta Žemaitiu akademėjė (rektuorios BUTRĒMS ADUOMS).

Tou pruga Varniu kultūras nomūs bova atėdaryta paruo- da "Varnee arkeuoluogėnie ėr ikuonuograpėnie medžėguo", Varniu katedruo vyka sakralėnės puoezėjės ėr mozėkas va- londa. Lėipas 29 dėina, pagerbdams žemaitiu istuorėku ėr kultūras darbininku ėiškuojėmus, miegėnėmus prikeltė kraš- ta, žadintė žmuoniū istuorėnė saamuonė, Varniu katedruo švėntas Mėšės laikė Žemaitiu vyskops VAIČIOS ANTANS.

Šees metaas konperencėjės tema bova "Varnee — kultū- ras miests". Anuos darbė dalyvava Lietovuos kultūras minis- terėjės sekretuorios BALČIŪNS VYTAUTS, Varniū miesta mers BROŽOS RUOLANDS, Telšiū rajuona valdytuos MARTIN- KOS PETROS, daug kėtū garbingū žmuoniū, katrėi iduo- majės mūsa krašta istuorėjė, palaika žemaitiu kultūrinī saa- jūdi.

Konperencėjuo pranešėma aple seniausius Varniu apylin- kės gyventuojus perskaitė OSTRAUSKS TUOMS. ŽULKOS VLADS analizava migracėjės puocesus Žemaitėjuo 13-17 om- žees. GENYS JUONS pasakuoję aple Varniu miesta raida, vuo GENIENĒ ZITA ėr GELŽINIS ARVYDS skaitė parnešė- mus aple Varniu konėgū semėnarėjė. Vėsė bova sožavietė puopesuorės DAUJUOTYTĒS VĒKTUORĒJĒS pasakuojęmo



Brožos Konstantins

aple rašytuojė JULIJUONA LINDĒS DUOBĒLA ėr Varniu klė- buona JUOZAPAVIČIAUS ONTUONA seserėis JUOZAPA- VIČIŪTĒS EMILĒJĒS draugystė, anū sosėrašėniejėma. Kaap ėr vėsumet, dėdėlė palaikyma sosėlaukė mozėkuoluogės KEL- MĒCKAITĒS ZITAS pranešėms, katros bova aple Varniu ėr anuo apylinkės senūju žmuoniū dainas. Anaa padiejė Žemai- tiu kultūras draugėjės Telšiū pavieta puolkluora an- samblis "Insula". Ons dainava varniškiu dainės ėr konperencėjės dalyvius linksmėna pri Lūksta ežė- ra. Tas ežers vėsėms žėnuoms tou, ka anuo pakron- ties yr rondama gintara. Konperencėjės dalyvee, kat- rus tuom dėnuom baisiausee konkėna dėdėlė karš- tee, atvažiavė pri tuo ežera, miegėna ėiškuotė vie- suos, bet saulė teep kaitėna, ka ne mažiau, kaap konperencėjės dalyvee, bova sokaitės ėr pats ežers. Tad... Belėka gryžtė i konperencėjės salė ėr tuoliau klausytės parnešėmu. Anėi vėns kėta papėldė ėr išryškėna, ka, gėlėnontėis i tuo senuojė Žemaitiu kultūras cėntra istuorėjė, kū tuoliau, tū daugiau tau ana daruos iduomi. Tou paliudėjė ėr MEILAUTS EL- MANTA pranešėms aple 17-18 omžiaus inventuo- rius ėr anūs rondamas žėnės aple Varniu gyventuo- jus. JANKAUSKS VIDMANTS papasakuoję M. Va- lončiaus paminkla Varniūs istuorėjė. KULAUSKS ANTANS prisimėnė aple senuosės muokyklas ėr knygnešius Varniu apylinkies. Varnėškė muokytuoję VĒNGRIENĒ VLADA sopažindėna so senūju var- nėškiu atsėmėnėmaas aple žemaitiu vyskopa Va- lončio Muotiejo. Konperencėjuo teep pat kalbiejė ėr VISOCKIS ALBINS, katros pasakuoję aple Var- niu konėgū semėnarėjė ėr Peterburga dvasėnė aka- demėjė. Kraštuotyryninks MISIOS KAZYS sopažin- dėna so varniškiu kuova ož savėvaldybiu teisiu grou-



Iš kairies: Žemaitiu vyskops VAIČIOS ANTANS, Telšiū rajuona valdy- tuos MARTINKOS PETROS, Kultūras ministerėjės sekretuorios BALČIŪNS VYTAUTS.



Iš kairies: Butrėms Aduoms, Kulakausks Antans.


ož savėvaldybiu teisiu groužėnėma.

Konperencėjuo kalbiejė Žemaitiu akademėjės rektuorios BUTRĖMS ADUOMS, Žemaitiu kultūras draugėjės pėrmininks KASPARAVIČIOS STASYS, Telšiū rajuona tarybas pėrmininks MARTINKOS PETROS, Varniu klėbuons PETRAUSKS ėr kėtė.

Konperencėjės dėinuom ivyka "Pėlnatėis" puosiedis, katramė bova ivertintė šiuo laiko Žemaitėjės kultūrėnemė gyvenėmė vykstuo pruocesa, numatyte svarbiausė darbaa atėiontėms metams, pažymėta Žemaitiu akademėjės vėinū metu sokaktės, pristatyts klaipiedėškė skulptuoriaus SAKALAUŠKĖ ARŪNAA sokorts skulptūras Giedraitiu Merkeliu ėr Daukšaa Mėkaluojou pruojects. Ta skulptūra jau kėtaas metaas torietom būtė pastatyta šalėp restauruojomas Varniu kongū semėnarėjės. Anuo torietom isėkortė pėrmasis Lietovuo regėjuonėnis sakralėnė mena moziejos. Darbaa vykst ėe neitikietėnaa greitaa. Konperencėjės dėinuom jau bova bėngams atstatytė semėnarėjės buokšts. Yr numatyta, ka moziejos ėe būs pradėts kortė tujau pat pu tuo, ka restauratuoree pabėngs darbus vėiname iš semėnarėjės korpusu.

Lėipas 30 dėina iškilmingaa Žemaitiu akademėjės, garbies narė vards (pėrmasis) soteikts ėr tou pruoga Žemaitiu akademėjės dipluoms iteikts kraštuotyriminkou iš Žemaitiu Kalvarėjės BROŽOU KONSTANTINOU.

Paskotėnė konperencėjės dėina anuos dalyvee aplonkė Rainiū kuoplyčė, Žemaitiu "Alkas" moziejo, Plungie isėkūrusi Žemaitiu dailės moziejo ėr ėe vei-



Sakalauškė Arūna sokorts skulptūras Giedraitiu Merkeliu ėr Daukšaa Mėkaluojou pruojects

kontė Ontroujė pasaulė žemaitiu dailės paruoda.

RAMONAITĖ DANUTĖ
Autoorės puortėgrapėjės



Būrtelis Varniu konperencėjės dalyviu (iš kairies): žornalistė, žemaitėšku radėjė laidū organizatuorė Grabytė Jūratė, Telšiū rajuona vyr. arkitektks Žebrausks Algėrds, Mažeikiu moziejaus dėrektorė Cholodinskienė Adelė, Žemaitiu kultūras draugėjės pėrmininks, Žemaitiu "Alkas" moziejaus dėrektorios Kasparavičios Stanisluovs, mozėkuoluogė Kelmėckaitė Zita, kalbininks Pabrieža Jūzaps.